

Weckherlin, Georg Rodolf: Die Roß (1641)

1 Kom/ Myrta/ der Lieb wohn vnd wohnung/
2 Der Schönheit pracht/ der Tugent Cron/
3 Vnlangst meiner trew werther wohn/
4 Jetz meiner wehrten trew belohnung:
5 Kom/ Myrta/ dises frülings ruhm/
6 Vnd aller blumen schönste blum/
7 Dich zu mir auff das grün zusötzen;
8 Daß du dich in der blumen zier/
9 Daß Ich der blumen zier in dir
10 Besehend/ wir Vns beed ergötzen.

11 Weil Amor nu allein zu gegen/
12 Der stehts durch deine augen Mich/
13 Der stehts durch meine augen Dich
14 Kan allein halten vnd bewögen:
15 So will Ich/ ja so kan ich nicht
16 Wendend mein/ fliehen dein gesicht;
17 Sondern der blümelein zu ehren/
18 Die als stern dises Element
19 Machen ein blumen-firmament/
20 Begehr ich dein gesang zu hören.

21 Solt ich zu singen mich bemühen
22 Von andern/ dan den blümelein/
23 Die vnder deiner augen schein
24 In dir frisch/ vnverwelcklich blühen?
25 Die gilg vnd rosen/ die gewiß
26 Ein wahres blumen paradiß
27 Auff deinem leib vns mahlen/ zwingen
28 Mich auch/ der Natur gunst vnd kunst
29 In dir betrachtend/ nichts mehr sunst
30 Dan dich der blumen ruhm zu singen.

31 Vnnötig/ Lieb/ ist dein liebkosen/

32 Weil wir nu vnder einem joch;
33 Wan ich dir dan lieb/ so sing doch
34 Jetzund von diesen süßen Rosen:
35 Sing von den Rosen/ edler schatz/
36 Vnd ich will dich mit einem schmatz
37 (vnd nicht zuvor) reichlich belohnen:
38 Vnd wie lieb du mir auch/ solt du
39 (enthaltend deine hand in ruh)
40 Jhn vor zu haben/ mir verschonen.

41 O Rosen/ die kein frost kan tödten/
42 Durch welche ich widrumb gesund;
43 O Rosen/ die den schönsten mund
44 Vnd wangen/ liebfärblich/ beröhten;
45 Euch Rosenmund/ vnd allein Euch
46 Gebühret in der Schönheit Reich
47 Auff der Lieb thron befelch zugeben:
48 Mir aber Euch/ die jhr gleichloß/
49 Vnd aller Rosen schönste Roß/
50 Dienstlich gehorsamend zu leben.

51 Wie in dem Himmel/ so auff erden
52 Kan nichts (dan deine herrlichkeit)
53 An schönheit vnd an süßigkeit
54 Der Rosen gleich gefunden werden:
55 Daher dan/ wan die Frülings zeit
56 Die welt zu der Lieb streit vnd beut
57 Behertzet/ vnd das erdreich zieret/
58 Erhebet sich die Roß mit wohn/
59 Allda/ weil Sie der blumen Cron/
60 Sie vnder allen triumfieret.

61 Die Morgenröhtin/ new-geboren/
62 Der Sonnen kind/ von thränen nassz/
63 Doch schmollend/ bald durch lieb vnd hassz

64 Von jhr verfolget vnd verloren/
65 Wan sie sich will mit höchstem pracht
66 Vnd in der newest schönsten tracht
67 Beklaiden/ muß sie alle morgen/
68 Sich zu beschönen/ zwar ohn scham/
69 Auß dem lieblichen Rosen-kram
70 All jhre anstreich-färblein borgen.

71 Dan früh alßbald wir nur erwachen
72 Vnd für dem jungen Sonnenglantz
73 Die stern vns jhren schein vnd dantz
74 Verbergen/ vnd vnsichtbar machen:
75 Mit lieblichen pomp vnd geruch
76 Gleichsam des Blumen-tags anbruch/
77 Die Roß/ den Lufft vnd vns ergötzet/
78 Vnd vns des himmels frische ehr/
79 Als ob sie himmelisch selbs wer/
80 Mit wunder für die augen sötzet.

81 Der rohte morgen muß verblaichen
82 (verliebet) ab der Rosen Zier/
83 Vnd küssend lasset er auff jhr
84 Der süssen küssen feuchte Zaichen:
85 Verbuhlet auch der Lufft vnd Wind/
86 Durch lieb
87 Mit jhr oft jhre küssz vermischen/
88 Vnd (frech) sich selbs vnd andre auch
89 Mit jhrem gleichsam süssen rauch
90 Zu mahl erfrewen vnd erfrischen.

91 Alßbald entknöpfend Sie auffstehet
92 Auß jhrem läger grün vnd new/
93 Alßbald Sie jmmer frisch vnd frey
94 Als eine kleine Sonn auffgehet:
95 Da sihet man sie bald von zorn

96 (beschützt zwar von manchem dorn
97 So jhre quardy wol zu nennen)
98 Warnemend daß jhr/ wie dem gold
99 Schier jederman gefährlich hold/
100 Schamroht vnd züchtig gleichsam brennen.

101 In jhrem vrsprung war vorzeiten
102 Die Roß so weissz/ daß mit jhr kaum
103 Des schnellen wassers frischer schaum
104 Noch auch des Morgens frost könt streitten;
105 Noch könt des silbers purer schein/
106 Der Milchrohn/ noch das helfenbein/
107 Bey jhrer weissin wol bestehen:
108 Ja/ weisser war die süsse Roß
109 Dan auff der kalten erden schoß
110 Der new-gefalne schnee zu sehen.

111 Als aber Venus hie auff erden
112 Durch jhrer schönheit gegenwart/
113 Mit jhren brüstlein zart vnd hart/
114 Mit hertz-entzündenden geberden/
115 Mit seel-ergründend süsser gunst/
116 Mit gaist-verblindend gailer kunst/
117 Mit küssen Nectar-gleich befeuchtet/
118 Mit jhrer augen liebem glantz/
119 Mit frölich-mügend-jungem dantz
120 Das volck bereichet vnd erleuchtet:

121 Da sah man sich die menschen naigen/
122 Vnd (lieb zu sein) auff alle weiß
123 Sich freindlich/ höflich/ sitsam/ weyß/
124 Auch wacker/ statlich/ kühn erzaigen:
125 Bald sah man dise fro auß lieb/
126 Vnd durch lieb jene kranck vnd trüeb;
127 Die eine sah man/ jhre schmerzen

- 128 Beklagend/ ohn trost/ hofnung/ hail:
129 Vnd andre frisch/ kurtzweilig/ gail/
130 Sich hertzend/ mit einander schertzen.

(Textopus: Die Roß. Abgerufen am 23.01.2026 von <https://www.textopus.de/poems/18997>)